

四庫全書

集部

欽定四庫全書

集部

東坡全集卷十一

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官編修臣徐立綱

謄錄監生臣章宗源

欽定四庫全書

東坡全集卷十一

宋 蘇軾 撰

詩七十二首

次韻秦太虛見戲耳聾

君不見詩人借車無可載留得一錢何足賴晚年更似
杜陵翁右臂雖存耳先聾人將蟻動作牛鬪我覺風雷
真一噫聞塵掃盡根性空不須更枕清流派太朴初散
失混沌六鑿相攘更勝敗眼花亂墜酒生風口業不停

詩有債君知五蘊皆是賊人生一病今先差但恐此心
終未了不見不聞還是礙今君疑我特佯聾故作嘲詩
窮嶮怪須防額癢出三耳莫放筆端風雨快

端午遍遊諸寺得禪字

肩輿任所適遇勝輒留連焚香引幽步酌茗開靜筵微
雨止還作小窻幽更妍盆山不見日草木自蒼然忽登
最高塔眼界窮大千卞峰照城郭震澤浮雲天深沉既
可喜曠蕩亦所便幽尋未云畢墟落生晚烟歸來記所

歷耿耿清不眠道人亦未寢孤燈同夜禪

送劉寺丞赴餘姚

中和堂後石楠樹與君對牀聽夜雨玉笙哀怨不逢人
但見香烟橫碧縷謳吟思歸出無計坐想蟋蟀空房語
明朝開鑠放觀潮豪氣正與潮爭怒銀山動地君不看
獨愛清香生雪霧別來聚散如宿昔城郭空存鶴飛去
我老人間萬事休君亦洗心從佛祖手香新寫法界觀
眼淨不覩登伽女餘姚古縣亦何有龍井白泉甘勝乳

千金買斷顧渚春似與越人降日注

李公擇過高郵見施大夫與孫莘老賞花詩憶

與僕去歲會于彭門折花餽筍故事作詩二

十四韻見戲依韻奉荅亦以一戲公擇云爾

汝陽真天人絹帽著紅椹纏頭三伯萬不買一微哂共

誇青山峯曲盡花不隕當時謫仙人逸韻謝封畛詩成

天一笑萬象解寒窘驚聞小桃杏不待雷發軫餘波尚

涓滴乞與居易稔爾來誰復見前輩風流盡寂寞兩詩

人殘紅對櫻筍饑腸得一醉妙語傳不泯君來恨不與
更復相牽引我老心已灰空煩扇餘燼天遊照六鑿虛
空掃充物懸知色竟空那復嗜烏吻蕭然一方丈居士
老龐蘊散花從滿袂不荅天女問故人猶故日怨句寫
餘恨疑我此心在遮防費欄楯應虞已斃蛇折尾時一
蠹仄聞孟光賢未學處仲忍

開闔放出
事見本傳

寄招應已足左

右侍雲鬢何時花月夜羊酒謝不敏此生如幻耳戲語
君勿愠應同亡是公一對子虛听

王翬清虛堂

清虛堂裏王居士閉眼觀身如止水水中照見萬象空
敢問堂中誰隱几吳興太守老且病堆案滿前長渴睡
願君勿笑反自觀夢幻去來殊未已長疑安石恐不免
未信犀首終無事勿將一念住清虛居士與我蓋同耳

和孫同年卞山龍洞禱晴

吳興連月雨釜甑生魚蛙往問卞山龍曷不安厥家梯
空上巉絕俯視驚谿研神井湧雲蓋陰崖垂鮮花交流

百道泉赴谷走羣蛇不知落何處隱隱如縑車我來叩
石戶飛鼠翻白鴉寄語洞中龍睡味豈不嘉雨師少弭
節雷師亦停撾積水得反壑稻苗出泥沙農夫免菜色
龍亦飽豚馱看君擁黃紬高卧放晚衙

乘舟過賈收水閣收不在見其子三首

愛酒陶元亮能詩張志和青山來水檻白雨滿漁蓑淚
垢添丁面貧低舉案蛾不知何所樂竟夕獨酣歌

嫋嫋風蒲亂猗猗水荇長小舟浮鴨綠大杓寫鵝黃得

意詩酒社終身魚稻鄉樂哉無一事何處不清涼

曳杖青苔岸繫船枯柳根德公方上冢季路獨留言已
占蒲魚港更開松菊園從茲來往數兒女自應門

次韻孫秘丞見贈

感槩清哀似變風老於詩句耳偏聰迂疎自笑成何事
冷淡誰能用許功不怕飛蚊如立豹肯隨白鳥過垂虹
吟哦相對忘三伏擬泛冰溪入雪宮

湖州多蚊豹脚尤
毒垂虹吳江亭名

與客遊道場何山得鳥字

清溪到山盡飛路盤空小紅亭與白塔隱見喬木杪中
休得小庵孤絕寄雲表洞庭在北戶雲水天渺渺庵僧
俗緣盡淨業洗未了十年畫鵲竹益以詩自繞高堂儼
像設禪室各深窈奔泉何處來華屋過溪沿何山隔幽
谷去路清且悄長松度翠蔓絕壁掛啼鳥我友自杭來
尚歎所歷少歸塗風雨作一洗紅日燎俄驚萬竅號黑
霧卷蓬蓼舟人紛變色坐羨輕鷗矯我獨喚酒杯醉死
勝流殍書生例強很造物空煩擾更將掀舞勢把燭畫

風篠美人為破顏正似腰支嫋明朝更陳迹清景墮空
杳作詩記餘歡萬古一昏曉

僕去杭五年吳中仍歲大饑疫故人往往逝去
聞湖上僧舍不復往日繁麗獨淨慈本長老
學者益盛作此詩寄之

來往三吳一夢間故人半作冢纍然獨依舊社傳真法
要與遺民度厄年趙叟近聞還印綬竺翁先已返林泉
何時杖策相隨去任性逍遙不學禪

舶趁風 并引

吳中梅雨既過颯然清風彌旬歲歲如此湖人謂之舶
趁風是時海舶初回云此風自海上與舶俱至云爾
三旬已過梅黃雨萬里初來舶趁風幾處縈回度山曲
一時清駛滿江東驚飄簌簌先秋葉喚醒昏昏嗜睡翁
欲作蘭臺快哉賦却嫌分別問雌雄

丁公默送蝥蟀

溪邊石蟹小如錢喜見輪囷赤玉盤半殼含黃宜點酒

兩螯斫雪勸加餐
蠻珍海錯聞名久
怪雨腥風入座寒
堪笑吳興饒太守
一詩換得兩尖團

送孫著作赴考城
魚寄錢醇老李邦直二君於

孫處有書見及

使君閒如雲欲出誰肯伴
清風獨無事一嘯亦可喚
來從白蘋洲吹我明月觀
門前遠行客青衫流白汗
問子何忽忽王事不可緩
故人錢與李清廟兩圭瓚
蔚為萬乘器尚記溝中斷
子亦東南珍價重不可算
別情何以

慰酒盡對空案惟持一榻涼
勸子巾少岸此風那復有
塵土飛灰炭欲寄二大夫
發發不可絆

泛舟城南會者五人分韻賦詩得人皆苦炎字

四首

城中樓閣似魚鱗不見清風起
白蘋試選苔溪最深處
仍呼我輩不羈人窺船野鶴
何曾下見燭飛蟲空自馴
遠郭荷花一千頃誰知六月
下塘春

苦熱誠知處處皆何當危坐學
心齋海螯要共詩人把

溪月行遭霧雨霾鄉國飄零斷書信弟兄流落隔江淮
便應築室苕溪上荷葉遮門水浸堦

紫蟹鱸魚賤如土得錢相付何曾數碧筩時作象鼻灣
白酒微帶荷心苦運肘風生看斫膾隨刀雪落驚飛縷
不將醉語作新詩飽食應慙腹如鼓

橋上游人夜未厭共依水檻立風簷樓中煮酒初嘗芡
月下新粧半出簾南郭清游繼顏謝北窓高卧等羲炎
人間寒熱無窮事自笑疎頑不受疢

次韻李公擇梅花

詩人固長貧日午饑未動偶然得一飽萬象困嘲弄尋
花不論命愛雪長忍凍天公非不憐聽飽即喧闕君為
三郡守所至滿賓從江湖常在眼詩酒事豪縱奉使今
折磨清比於陵仲永懷茶山下携妓脩春貢更憶檻泉
亭插花雲髻重蕭然卧瀟蕭愁聽春禽哢忽見早梅花
不飲但孤諷詩成獨寄我字字愈頭痛嗟君本侍臣筆
素從上雍脫鞞吟芍藥給札賦雲夢何人慰流落嘉藹

天為種杯傾笛中吟帽拂果下鞚感時念羈旅此意吾
儕共故山亦何有桐花集么鳳君亦憶匡廬歸掃藏書
洞何當種此花各抱漢陰壘

送淵師歸徑山

我昔嘗為徑山客至今詩筆餘山色師住此山三十年
妙語應須得山骨溪成六月水雲蒸飛蚊猛捷如花鷹
羨師方丈冰雪冷蘭膏不動長明燈山中故人知我至
爭來問訊今何似為言百事不如人兩眼猶能書細字

徑山夏無蚊余舊詩云問龍乞
水歸洗眼欲看細字銷殘年

送表忠觀錢道士歸杭

先生舊德在民心著令稱忠上意深墮淚行看會祠下
挂名爭欲刻碑陰淒涼破屋塵甍座憔悴雲孫雪滿簪
未信諸豪容郭解却從他縣施千金

次韻周開祖長官見寄

俯仰東西閱數州老於歧路豈伶優初聞父老推謝令
旋見兒童迎細侯政拙年年祈水旱民勞處處避嘲謳

河吞巨野那容塞盜入蒙山不易搜仕道固應慙孔孟
扶顛未可責由求漸謀田舍猶懷祿未脫風濤且傍洲
罔罔可憐真喪狗時時相觸是虛舟竭來震澤都如夢
只有苕溪可倚樓齋釀酸甜如蜜水樂工零落似風甌
遠思顏柳並諸謝近憶張子陳令與老劉風定軒窓飛
豹脚雨餘欄檻上蝸牛舊遊到處皆蒼蘚同甲惟君尚
黑頭憶昔湖山共尋勝相逢杯酒兩忘憂醉看梅雪清
香過夜棹風舩駭汗流百首共成山上集三人俱作月

中遊海南未起垂天翼
澗底仍依徑寸床
已許秋風歸
過我預憂詩筆老
難疇此生歲月行
飄忽晚節功名亦
繆悠犀首正緣無事飲
馮驩應為有魚留
徒今便踏青
州麴薄酒知君笑督郵

林子中以詩寄文與可及余與可既歿追和其
韻

斯人所甚厭投畀每不受
欲其少須臾奪去惟恐後
云誰尸此職無乃亦假守
賦才有巨細無異斛與斗
胡不

安其分但聽物所誘時來各飛動意合無妍醜坐令雞
栖車長載朱伯厚平生無一旅既死咤萬口自聞與可
亡胸臆生堆阜懸知臨絕意要我一執手相望五百里
安得自其曠遺文付來哲後事待諸友伶俜搖紹孤老
病孟光偶世人賤目見爭笑千金帚君詩與楚詞識者
當有取但知愛墨竹此歎吾已久故人多厚祿能復哀
君否不見林與蘇蘇饑寒自奔走

與王郎昆仲及兒子邁遠城觀荷花登峴山亭

晚入飛英寺分韻得月明星稀四首

昨夜雨鳴渠曉來風襲月蕭然欲秋意溪水清可啜環
城三十里處處皆佳絕蒲蓮浩如海時見舟一葉此間
真避世青鬢低白髮相逢欲相問已逐鷺鷥沒

清風定何物可愛不可名所至如君子草木有嘉聲我
行本無事孤舟任斜橫中流自偃仰適與風相迎舉杯
屬浩渺樂此兩無情歸來兩溪間雲水夜自明

苔水如漢水鱗鱗鳴頭青吳興勝襄陽萬瓦浮青冥我

非羊叔子愧此峴山亭悲傷意則同歲月如流星從我
兩王子高鴻挿脩翎湛輩何足道當以德自銘

吏民憐我懶鬪訟日已稀能為無事飲可作不夜歸復
尋飛英游盡此一寸暉撞鐘履聲集顛倒雲山衣我來
無時節杖屨自推扉莫作使君看外似中已非

城南縣尉水亭得長字

兩尉鬱相望東南百步場揮旗蒲柳市伐鼓水雲鄉已
作觀魚檻仍開射鴨堂全家依畫舫極目亂紅粧漱漱

波頭細疎雨脚長
我來閒濯足溪漲欲浮林澤國
山圍裏孤城水影傍
欲知歸路處葦外記風檣

與胡祠部遊法華山

波湖欲盡山為界
始見寒泉落高派
道人未放泉出山
曲折虛堂瀉清快
使君年老尚兒戲
綠棹紅船舞澎湃
一笑翻杯水濺裙
餘懽濯足波生隘
長松攬天龍起立
蒼藤倒谷雲崩壞
仰穿蒙密得清曠
一覽震澤吁可怪
誰云四萬八千頃
渺渺東盡日所矚
歸塗十里盡風荷

清唱一聲聞露薤

是日樂工有
作此聲者

嗟余少小慕真隱白髮

青衫天所械忽逢佳士與名山何異枯楊便馬疥君猶
鸞鶴偶飄墮六翮如雲豈長鍛不將新句紀茲遊恐負
山中清淨債

又次前韻贈賈耘老

具區吞滅三州界浩浩蕩蕩納千派從來不著萬斛船
一葦漁舟恣奔快仙壇古洞不可到空聽餘瀾鳴泝泝
今朝偶上法華嶺縱觀始覺人寰隘山頭卧碣吊孤冢

下有至人僵不壞空餘白棘網秋蟲無復青蓮出幽怪

事見本院碑

我來徙倚長松下欲掘茯苓親洗晒聞道山中

富竒藥往往靈芝雜葵薤詩人空腹待黃精生事只看

長柄械

杜子美詩云長鏡短鏡白木柄我生託子以為命

今年大熟期一飽食

葉微蟲真癬疥

今歲有小蟲食葉不甚為害

白花半落紫繸香攬臂

欲助磨鍊鍛安得山泉變春酒與子一洗尋常債

趙閱道高齋

見公奔走謂公勞聞公隱退云公高公心底處有高下

夢幻去來隨所遭不知高齋竟何義此名之設緣吾曹
公年四十已得道俗緣未盡餘伊臯功名富貴俱逆旅
黃金知繫何人袍超然已了一大事挂冠而去真秋臺
坐看猿猴落置罔兩手未肯置所操乃知賢達與愚陋
豈直相去九牛毛長松百尺不自覺企而羨者蓬與蒿
我欲贏糧往問道未應舉臂辭盧敖

送俞節推

尚之子尚
字退翁

吳興有君子淡如朱絳琴一唱三大息至今有遺音嗟

余與夫子相避如辰參

退翁官于蜀余在京師余歸而退翁去及余官于吳興則退翁

矣

猶喜見諸郎窈然清且深異時多良士末路喪初心

我生不有命其肯枉尺尋

次韻荅孫侔

十年身不到朝廷欲伴騷人賦落英但得低頭拜東野
不辭中路伺淵明艤舟苔雪人安在卜築江淮計已成
千里論文一言足與君蓋亦不須傾

重寄一首

凜然高節照時人，不信微官解免君。
蔣濟謂能來阮籍，薛宣直欲吏朱雲。
好詩衝口誰能擇，俗子疑人未遣聞。
乞取千篇看俊逸，不將輕比鮑參軍。

次韻和劉貢甫登黃樓見寄并寄子由二首

清派連淮上，黃樓冠海隅。
此詩尤偉麗，夫子計魁梧。

劉為

人短小世俗輕瑚璉，巾箱襲武夫。
坐令乘傳遽奔走，為儲

須邂逅我已失，登臨誰與俱。
貧倉氏粟身聽治，家撫會合難前定。
歸休試後圖，腴田未可買窮鬼。
却須呼

木欲

買田於泗上
近已不遠矣
二水何年到雙洪不受艫至今清夜夢飛

轡策天吳

此詩寄劉

與子皆去國十年天一隅數竒逢惡歲計拙集枯梧好

士餘劉表窮交憶灌夫不矜持漢節猶計攬桓須清句

金絲合高樓雪月俱吟哦出新意指畫想前樞

子由初赴南京

送之出東門登城上覽山川之勝云此地可作樓觀於是始有改築之意

自寫千言賦新裁

六幅圖

近以絹自寫子由黃樓賦為六幅圖甚妙

傳看一坐聳勸著尺書呼

莫使騷人怨東游不到吳

此詩寄子由

陳州與文郎逸民飲別携手河堤上作此詩

白酒無聲滑瀉油醉行堤上散吾愁春風料峭羊角轉
河水渺綿瓜蔓流君已思歸夢巴峽我能未到說黃州
此生聚散何窮已未忍悲歌學楚囚

子由自南都來陳三日而別

夫子自逐客尚能哀楚囚奔馳二百里徑來寬我憂相
逢知有得道眼清不流別來未一年落盡驕氣浮嗟我
晚聞道款啟如孫休至言雖久服放心不自收悟彼善

知識妙藥應所投納之憂患場磨以百日愁冥頑雖難
化鑄發亦已周平時種種心次第去莫留但餘無所還
永與夫子遊此別何足道大江東西州畏蛇不下榻睡
足吾無求便為齊安民何必歸故丘

正月十八日蔡州道上遇雪次子由韻二首

蘭菊有生意微陽回寸根方憂集莫雪復喜迎朝暾憶
我故居室浮光動南軒松竹半傾瀉未數葵與萱三徑
瑤草合一餅井花溫至今行吟處尚餘履舄痕一朝出

從仕永愧李仲元晚歲益可羞犯雪方南奔山城買廢
圃槁葉手自掀長使齊安人指說故侯園

鉛膏染鬢鬚旋露霜雪根不如閉目坐丹府夜自瞰誰
知憂患中方寸寓羲軒大雪從壓屋我非兒女萱平生
學踵息坐覺兩鞮溫下馬作雪詩滿地鞭箠痕佇立望
原野悲歌為黎元道逢射獵子遙指狐兔奔蹤跡尚可
尋窟穴何足掀寄謝李丞相吾將反丘園

過新息留示鄉人任師中

任時知瀘州
亦生事對獄

昔年嘗羨任夫子卜居新息臨淮水怪君便爾忘故鄉

稻熟魚肥信清美竹陂鴈起天為黑

小竹陂在縣北

桐柏煙橫

山半紫

桐柏廂在縣南

知君坐受兒女困悔不先歸弄清泚塵

埃我亦失收身此行蹭蹬尤可鄙寄食方將依白足附書未免煩黃耳往雖不及來有年詔恩倘許歸田里却

下關山入蔡州為買烏犍三百尾

黃州出水牛

過淮

朝離新息縣初亂一水碧莫宿淮南村已渡千山赤磨

颯號古戍霧雨暗破驛回頭梁楚郊永與中原隔黃州
在何許想像雲夢澤吾生如寄耳初不擇所適但有魚
與稻生理已自畢獨喜小兒子少小事安佚相從艱難

中肝肺如鐵石便應與晤語何止寄衰疾

時家在子由處獨與兒子

來
邁南

書磨公詩後 并叙

過加祿鎮南二十五里大許店休焉于逆旅祁宗祥家
見壁上有幅紙題詩云滿院秋光濃欲滴老僧倚杖青

松側只怪高聲問不鷹瞋余踏破蒼苔色其後題云滄
水僧寶磨宗祥謂余此光黃間狂僧也年百三十死於
熙寧十年既死人有見之者宗祥言其異事甚多作是
詩以識之磨公本名清戒俗謂之戒和尚云

磨公昔未化來往淮山曲壽逾兩甲子氣壓諸尊宿但
嗟濁惡世不受龍象蹴我來不及見悵望空遺躅霜顛
隱白毫鎖骨埋青玉皆云似達磨隻履還天竺壁間餘
清詩字勢頗拔俗為吟五字偈一洗凡眼肉

游淨居寺

并叙

寺在光山縣南四十里大蘇山之南小蘇山之北寺僧居仁為余言齊天保中僧思惠過此見父老問其姓曰蘇氏又得二山名乃歎曰吾師告我過三蘇則住遂留結庵而父老竟無有蓋山神也其後僧智顛見思於此山而得法焉則世所謂思大和尚智者大師是也唐神龍中道岸禪師始建寺於其地廣明庚子之亂寺廢於兵火至乾興中乃復而賜名曰梵天云

十載游名山自製山中衣願言畢婚嫁携手老翠微不
悟俗緣在失身蹈危機刑名非夙學陷穽損積威遂恐
死生隔永與雲山違今日復何日芒鞋自輕飛稽首兩
足尊舉頭雙涕揮靈山會未散八部猶光輝願從二聖
往一洗千劫非褻回竹溪月空翠搖煙霏鐘聲自送客
出谷猶依依回首吾家山歲晚將焉歸

梅花二首

春來幽谷水潺潺的皜梅花草棘間一夜東風吹石裂

半隨飛雪渡關山

何人把酒慰深幽
開自無聊落更愁
幸有清溪三百曲
不辭相送到黃州

戲作種松

我昔少年日種松
滿東岡初移一寸根
瑣細如插秧
二年黃茅下一一攢
麥芒三年出蓬艾
滿山散牛羊
不見十餘年
想作龍蛇長
夜風波浪碎
朝露珠璣香
我欲食其膏
已伐百本桑

煮松脂法用桑柴灰水

人事多乖
迺神藥竟渺

茫竭來齊安野夾路鬚髯蒼會開龜蛇窟不惜斤斧創
縱未得伏苓且當拾流肪釜蓋百出入皎然散飛霜槁
死三彭仇澡換五谷腸青骨凝綠髓丹田發幽光白髮
何足道要使雙瞳方却後五百年騎鶴還故鄉

萬松亭

并叙

麻城縣令張毅植萬松於道周以芘行者且以名其亭
去未十年而松之存者十不及三四傷來者之不嗣其意
也故作是詩

十年栽種百年規好德無人助我儀

古語云一年之計樹之以穀十年之

計樹之以木百年之計樹之以德

縣令若同倉庾氏亭松應長子孫枝

天公不救斧斤厄野火解憐冰雪姿為問幾株能合抱

慇懃記取角弓詩

張先生 并叙

先生不知其名黃州故縣人本姓盧為張氏所養陽狂垢污寒暑不能侵常獨行市中夜或不知其所止往來者欲見之多不能致余試使人召之欣然而來既至立

而不言與之言不應使之坐不可但俯仰熟視傳舍堂
中久之而去夫孰非傳舍者是中竟何有乎然余以有
思惟心追躡其意蓋未得也

熟視空堂竟不言故應知我未天全肯來傳舍人皆說
能致先生予亦賢脫屣不妨眠糞屋流澌爭看浴冰川
士庶豈識桃椎妙妄意稱量未必然

陳季常所畜朱陳村嫁娶圖

何年顧陸丹青手畫作朱陳嫁娶圖聞道一村惟兩姓

金步尺八ノ三
卷十一
不將門戶買崔盧

我是朱陳舊使君
勸耕曾入杏花村
而今風物那堪畫

縣吏催錢夜打門

朱陳村在
徐州蕭縣

少年時嘗過一村
院見壁上有詩云
夜涼疑有

雨院靜似無僧
不知何人詩也
宿黃州禪智

寺寺僧皆不在
夜半雨作偶記
此詩故作一

絕

佛燈漸暗饑鼠出
山雨欲來脩竹鳴
知是何人舊詩句

已應知我此時情

初到黃州

自笑平生為口忙，老來事業轉荒唐。
長江遠郭知魚美，好竹連山覺筍香。
逐客不妨負外置，詩人例作水曹郎。
只慙無補絲毫事，尚費官家壓酒囊。

檢校官例折支
多得退酒袋

定惠院寓居月夜偶出

幽人無事不出門，偶逐東風轉良夜。
參差玉宇飛木末，繚繞香烟來月下。
江雲有態清自媚，竹露無聲浩如瀉。

白集卷之十一
卷十一
已驚弱柳萬絲垂尚有殘梅一枝亞清詩獨吟還自和
白酒已盡誰能借不辭青春忽忽過但恐懽意年年謝
自知醉耳愛松風會揀霜林結茅舍浮浮大甌長炊玉
溜溜小槽如壓蔗飲中真味老更濃醉裏狂言醒可怕
但當謝客對妻子倒冠落佩從嘲罵

次韻前篇

去年花落

去年徐州花下對月與張君厚王子

中兄弟飲酒作頻字韻詩

今年黃州見花發小院閉門風露下萬事

如花不可期餘年似酒那禁瀉憶昔還鄉泝巴峽落帆

樊口

在黃州南岸

高桅亞長江袞袞空自流白髮紛紛寧少

借竟無五畝繼沮溺空有千篇凌鮑謝至今歸計負雲
山未免孤衾眠客舍少年辛苦真食蓼老景清閒如啖
蔗饑寒未至且安居憂患已空猶夢怕穿花踏月飲村
酒免使醉歸官長罵

安國寺浴

老來百事懶身垢猶念浴衰髮不到耳尚煩月一沐山

城足薪炭烟霧濛濛湯谷塵垢能幾何
脩然脫羈梏披衣坐小閣散髮臨脩竹
心困萬緣空身安一牀足豈惟忘淨穢
兼以洗榮辱默歸無多談此理觀要熟

安國寺尋春

卧聞百舌呼春風起尋花柳村村
同城南古寺脩竹合小房曲檻歌
深紅看花歎老憶年少對酒思家
愁老翁病眼不羞雲母亂鬢絲
強理茶烟中遙知二月王城外
玉仙洪福花如海薄羅雲霧蓋
新粧快馬爭風鳴雜珮

玉川先生真可憐
一生耽酒終無錢
病過春風九十日
獨抱添丁看花發

寓居定惠院之東
雜花滿山有海棠一株
土人不知貴也

江城地瘴蕃草木
只有名花苦幽獨
嫣然一笑竹籬間
桃李漫山總麤俗
也知造物有深意
故遣佳人在空谷
自然富貴出天姿
不待金盤薦華屋
朱唇得酒暈生臉
翠袖卷紗紅映肉
林深霧暗曉光遲
日暖風輕春睡足

雨中有淚亦淒愴月下無人更清淑先生食飽無一事
散步逍遙自捫腹不問人家與僧舍拄杖敲門看脩竹
忽逢絕艷照衰朽歎息無言揩病目陋邦何處得此花
無乃好事移西蜀寸根千里不易到銜子飛來定鴻鵠
天涯流落俱可念為飲一樽歌此曲明朝酒醒還獨來
雪落紛紛那忍觸

次韻樂著作野步

老來幾不辨西東秋後霜林且強紅眼暈見花真是病

耳虛聞蟻定非聰酒醒不覺春強半睡起常驚日過中
植杖偶逢為黍客披衣閒詠舞雩風仰看落蕊收松粉
俯見新芽摘杞叢楚雨還昏雲夢澤吳潮不到武昌宮
組歸來成二老風流他日與君同

黃州對岸武昌
縣有孫權故宮

廢興古郡詩無數寂寞閒窓易粗通解

二月二十六日雨中熟睡至晚強起出門還作

此詩意思殊昏昏也

卯酒困三盃午餐便一肉雨聲來不斷睡味清且熟昏

昏覺還卧展轉無由足強起出門行孤夢猶可續泥深
竹雞語村暗鳩婦哭明朝看此詩睡語應難讀

雨晴後步至四望亭下魚池上遂自乾明寺前

東岡上歸二首

雨過浮萍合蛙聲滿四鄰海棠真一夢梅子欲嘗新拄
杖閒挑菜鞦韆不見人慙慙木芍藥獨自殿餘春

高亭廢已久下有種魚塘暮色千山入春風百草香市
橋人寂寂古寺竹蒼蒼鶴鶴來何處號鳴滿夕陽

雨中看牡丹三首

霧雨不成點，映空疑有無。
時於花上見，的皪走明珠。
秀色洗紅粉，暗香生雪膚。
黃昏更蕭瑟，頭重欲相扶。

明日雨當止，晨光在松枝。
清寒入花骨，肅肅初自持。
午景發穠麗，一笑當及時。
依然暮還歛，亦自惜幽姿。

幽姿不可惜，後日東風起。
酒醒何所見，金粉抱青子。
千花與百草，共盡無妍鄙。
未忍汙泥沙，牛酥煎落蕊。

次韻樂著作送酒

少年多病怯盃觴老去方知此味長
萬斛羈愁都似雪
一壺春酒若為湯

次韻樂著作天慶觀醮

濁世紛紛肯下臨
夢尋飛步五雲深
無因上到通明殿
只許微聞玉佩音

王齊萬秀才寓居武昌縣劉郎汭正與伍洲相
對伍子胥奔吳所從渡江也

君家稻田冠西蜀
擣玉揚珠三萬斛
塞江流涕起書樓

碧瓦朱欄照山谷，傾家取樂不論命。
散盡黃金如轉燭，惟餘舊書一百車。
方舟載入荆江曲，江上青山亦何有。
伍洲遙望劉郎藪，明朝寒食當過君。
請殺耕牛壓私酒，與君飲酒細論文。
酒酣訪古江之濱，仲謀公瑾不須弔。

一酌波神英烈君

杭州伍子胥廟封英烈王

杜沂遊武昌以醑釀花菩薩泉見餉二首

醑釀不爭春，寂寞開最晚。
青蛟走玉骨，羽蓋蒙珠幃。
不粧艷已絕，無風香自遠。
淒涼吳宮闕，紅粉埋故苑。
至今

微月夜笙簫來絕巘餘妍入此花千載尚清婉怪君呼
不歸定為花所挽昨宵雷雨惡花盡君應返

君言西山頂自古流白泉上為千牛乳下有萬石鈿不
愧惠山味但無陸子賢願君揚其名庶託文字傳寒泉
比吉士清濁在其源不食我心惻於泉非所患嗟我本
何有虛名空自纏不見子柳子餘愚汙溪山

陳季常自岐亭見訪郡中及舊州諸豪爭欲邀

致之戲作陳孟公詩一首

孟公好飲寧論斗醉後闔門防客走不妨閒過左阿君
百謫終為賢太守老居閭里自浮沉笑問伯松何苦心
忽然載酒從陋巷為愛揚雄作酒箴長安富兒求一過
千金壽君君笑唾汝家安得客孟公從來只識陳驚座

東坡全集卷十一

欽定四庫全書

東坡全集卷十二

宋 蘇軾 撰

詩八十九首

游武昌寒溪西山寺

連山蟠武昌翠木蔚樊口我來已百日欲濟空搔首坐
看鷗鳥沒夢逐麇麕走今朝橫江來一葦寄哀朽高談
破巨浪飛屨輕重阜去人曾幾何絕壁寒溪吼風泉兩
部樂松竹三益友徐行欣有得芝朮在蓬莠西上九曲

亭衆山皆培塿却看江北路雲水渺何有離離見吳宮
莽莽見楚藪空傳孫郎石無復陶公柳爾來風流人惟
有漫浪叟買田吾已決乳水况宜酒所須脩竹林深處
安井臼相將踏勝絕更裏三日糗

武昌銅劍歌

并叙

供奉官鄭文嘗官於武昌江岸裂出古銅劍文得之以
遺余冶鑄精巧非鍛冶所成者

雨餘江清風卷沙雷公躡雲捕黃蛇蛇行空中如枉矢

電光煜煜燒蛇尾或投以塊鏗有聲雷飛上天蛇入水
水上青山如削鐵神物欲出山自裂細看兩脅生碧花
猶是西江老蛟血蘇子得之何所為蒯緱彈鋏詠新詩
君不見凌煙功臣長九尺腰間玉具高挂頤

定惠顯師為余竹下開嘯軒

啼鳩催天明喧喧相詆譙暗蛩泣夜永唧唧自相弔飲
風蟬至潔長吟不改調食土矧無腸亦自終夕叫鳶貪
聲最鄙鵲喜意可料皆緣不平鳴慟哭等嬉笑阮生已

粗率孫子亦未妙道人開此軒清坐默自照衝風振河
海不能號無竅累盡吾何言風來竹自嘯

石芝

并叙

元豐三年五月十一日癸酉夜夢游何人家開堂西門
有小園古井井上皆蒼石石上生紫藤如龍蛇枝葉如
赤箭主人言此石芝也余率爾折食一枝衆皆驚笑其
味如雞蘇而甘明日作此詩

空堂明月清且新幽人睡息來初勻了然非夢亦非覺

有人夜呼祁孔賓披衣相從到何許朱欄碧井開瓊戶
忽驚石上堆龍蛇玉芝紫筍生無數鏘然敲折青珊瑚
味如蜜藕和雞蘇主人相顧一撫掌滿堂坐客皆盧胡
亦知洞府嘲輕脫終勝嵇康羨王烈神仙一合五百年
風吹石髓堅如鐵

今年正月十四日與子由別於陳州五月子由
復至齊安未至以詩迎之

驚塵急雪滿貂裘淚洒東風別宛丘又向邯鄲枕中見

却來雲夢澤南州，睽離動作三年計。牽挽當為十日留。

早晚青山映黃髮，相看萬事一時休。

柳子厚別劉夢得詩云：聖恩若許歸。

田去黃髮相
看萬事休

遷居臨臯亭

我生天地間，一蟻寄大磨。區區欲右行，不救風輪左。雖云走仁義，未免違寒餓。劍米有危炊，鍼氈無穩坐。豈無佳山水，借眼風雨過。歸田不待老，勇決凡幾箇。幸茲廢棄餘，疲馬解鞍馱。全家占江驛，絕境天為破。饑貧相乘

除未見可弔賀澹然無憂樂苦語不成些

曉至巴河口迎子由

去年御史府舉動觸四壁幽幽百尺井仰天無一席隔
墻聞歌呼自恨計之失留詩不忍寫苦淚漬紙筆餘生
復何幸樂事有今日江流鏡面淨烟雨輕幕幕孤舟如
鳧鷖點破千頃碧聞君在磁湖欲見隔咫尺朝來好風
色旗尾西北擲行當中流見笑臉青光溢此邦疑可老
脩竹帶泉石欲買柯氏林茲謀待君必

與子由同游寒溪西山

散人出入無町畦朝游湖北暮淮西高安酒官雖未上
兩脚垂欲穿塵泥與君聚散若雲雨共惜此日相提携
千搖萬兀到樊口一箭放溜先鳧鷖層層草木暗西嶺
瀏瀏霜雪鳴寒溪空山古寺亦何有歸路萬頃青玻瓈
我今漂泊等鴻鴈江南江北無常栖幅巾不擬過城市
欲踏徑路開新蹊路有直入寒溪不過武昌者却憂別後不忍到見
子行迹空餘悽吾儕流落豈天意自坐迂濶非人擠行

逢山水輒羞歎此去未免勤鹽齏何當一遇李八百相

哀白髮分刀圭

李八百宅
在筠州

次韻荅子由

平生弱羽寄衝風此去歸飛識所從好語似珠穿一一
妄心如膜退重重山僧有味寧知子瀧吏無言只笑儂
尚有讀書清淨業未容春睡敵千鍾

和何長官六言次韻

作邑君真伯厚去官我豈曼容一屢願託仁政六字難

賡變風

五噫已出東洛三復願比南容學道未從潘盎

南海謂狂為盎

潘近世得道者也

草書猶似揚風

揚凝式也

石渠何須反顧水驛幸足相容長江大欲見底探支八

月涼風

清風初號地籟明月自寫天容貧家何以娛客但知抹

月批風

青山自是絕色無人誰與為容說向市朝公子何殊馬

耳東風

觀張師正所蓄辰砂

將軍結髮戰蠻溪
篋有珠珍勝象犀
漫說玉林分箭鏃
何曾金鼎識刀圭
近聞猛士收丹穴
欲助君王鑄裹蹄
多少空巖人不見
自隨初日吐虹霓

五禽言

并叙

梅聖俞嘗作四禽言
余謫黃州寓居定惠院
遶舍皆茂林脩竹
荒池蒲葦春夏之交
鳴鳥百族土人多以其聲

之似者名之遂用聖俞體作五禽言

使君向蘄州更唱蘄州鬼我不識使君寧知使君死人

生作鬼會不免使君已老知何晚

王元之自黃移蘄州聞啼鳥問其名或對

曰此名蘄州鬼元之大惡之果卒於蘄

南山昨夜雨西溪不可渡溪邊布穀兒勸我脫破袴不

辭脫袴溪水寒水中照見催租瘢

土人謂布穀為脫却破袴

去年麥不熟挾彈規我肉今年麥上場處處有殘粟豐

年無象何處尋聽取林間快活吟

此鳥聲云麥飯熟即快活

力作力作蠶絲一百箔攏上麥頭昂林間桑子落願儂

一箔千兩絲繅絲得蛹飼爾雛

此鳥聲云蠶絲一百箔

姑惡姑惡姑不惡妾命薄君不見東海孝婦死作三年

乾不如廣漢龐姑去却還

姑惡水鳥也俗云婦以姑虐死故其聲云

次韻子由病酒肺疾發

憶子少年時肺喘疲坐卧喊呀或終日勢若風雨過虛
陽作浮漲客冷仍下墮妻孥恐悵望膾炙不登坐終年
禁晚食半夜發清餓胃強鬲苦滿肺斂腹輒鼓三彭恣

啖齧二豎肯遁播寸田可治生誰勸耕黃稷

新法方田
謂上腴為

黃稷探懷得真藥不待君臣佐初如雪花積漸作櫻珠大

隔墻聞三噉隱隱如轉磨自茲失故疾陽唱陰輒和神
仙多歷試中路或坎坷平生不盡器痛飲知無奈舊人
眼看盡老伴餘幾箇殘年一斗粟待子同春簸云何不
自珍醉病又一挫真源結梨棗世味等糠莖耕耘當待
獲願子勤自課相將賦遠遊仙語不用些

正月二十日往歧亭郡人潘古郭三人送余於

女王城東禪莊院

一本作代書寄桃
山居士張聖可

十日春寒不出門不知江柳已搖村
稍聞泱泱流水谷盡放青青沒燒痕
數畝荒園留我住半瓶濁酒待君溫
去年今日關山路細雨梅花正斷魂

鐵拄杖

并叙

柳真齡字安期閩人也家寶一鐵拄杖如柳栗木牙節
宛轉天成中空有簧行輒微響柳云得之浙中相傳王
審知以遺錢鏐鏐以賜一僧柳偶得之以遺余作此詩

謝之

柳公手中黑蛇滑千年老根生乳節忽聞鏗然爪甲聲
四座驚顧知是鐵含簧腹中細泉語迸火石上飛星裂
公言此物老有神自昔閩王餉吳越不知流落幾人手
坐看變滅如春雪忽然贈我意安在兩脚未許甘泉歇
便尋轍迹訪崆峒徑渡洞庭探禹穴披榛覓藥採芝菌
刺虎鋌蛟搗蛇蝎會教化作兩錢錐歸來見公未華髮
問我鐵君無恙否取出摩挲向公說

與潘三失解後飲酒

千金弊帚人誰買，半額蛾眉世所妍。
顧我自為都眊瞎，憐君欲鬪小婬娟。
青雲豈易量他日，黃菊猶應似去年。
醉裏未知誰得喪，滿江風月不論錢。

東坡八首

并叙

余至黃州二年，日以困匱，故人馬正卿哀余乏食，為於郡中請故營地數十畝，使得躬耕。其中地既久荒，為茨棘瓦礫之場，而歲又大旱，墾闢之勞筋力殆盡，擇耒而歎。

乃作是詩自懲其慙庶幾來歲之入以忘其勞焉

廢壘無人顧頽垣滿蓬蒿誰能捐筋力歲晚不償勞獨
有孤旅人天窮無所逃端來拾瓦礫歲旱土不膏崎嶇
草棘中欲刮一寸毛喟焉釋耒歎我廩何時高

荒田雖浪莽高庳各有適下隰種杭稌東原蒔棗栗江
南有蜀士桑果已許乞好竹不難栽但恐鞭橫逸仍須
卜佳處規以安我室家童燒枯草走報暗井出一飽未
敢期瓢飲已可必

自惜有微泉來從遠嶺背穿城過聚落流惡壯蓬艾去
為柯氏陂十畝魚蝦會歲旱泉亦竭枯萍粘破塊昨夜
南山雲雨到一犁外泫然尋故瀆知我理荒蕪泥芹有
宿根一寸嗟獨在雪芽何時動春鳩行可膾

蜀人貴芹
芽膾雜鳩

肉作
之

種稻清明前樂事我能數毛空暗春澤鉞水聞好語

蜀人

以細雨為雨毛稻初生
時農夫相語稻鉞出矣

分秧及初夏漸喜風葉舉月明

看露上一一珠垂縷秋來霜穗重顛倒相撐拄但聞哇

壟間蚱蜢如風雨

蜀中稻熟時蚱蜢羣飛田間如小蝗狀而不害稻

新春便入

甌玉粒照筐筥我久食官倉紅腐等泥土行當知此味

口腹吾已許

良農惜地力幸此十年荒桑柘未及成一麥庶可望
種未逾月覆塊已蒼蒼農夫告我言勿使苗葉昌君欲
富餅餌要須縱牛羊再拜謝苦言得飽不敢忘

種棗期可剝種松期可斲事在十年外吾計亦已慙十
年何足道千載如風電舊聞李衡奴此策疑可學我有

同舍郎官居在瀟岳

李公擇也

遺我三寸柑照坐光卓犖百

栽儻可致當及春冰渥想見竹籬間青黃垂屋角

潘子久不調沽酒江南村郭生本將種賣藥西市垣古
生亦好事恐是押牙孫家有十畝竹無時客叩門我窮
交舊絕三子獨見存從我於東坡勞餉同一餐可憐杜
拾遺事與朱阮論吾師卜子夏四海皆弟昆

馬生本窮士從我二十年日夜望我貴求分買山錢我
今反累生借耕輟茲田刮毛龜背上何時得成羶可憐

馬生癡至今誇我賢衆笑終不悔施一當獲千

題織錦圖上回文三首

春晚落花餘碧草夜涼低月半枯桐人隨遠鴈邊城暮
雨映疎簾繡閣空

紅手素絲千字錦故人新曲九回腸風吹絮雪愁縈骨
淚洒縑書恨見郎

羞看一首回文錦錦似文君別恨深頭白自吟悲賦客
斷腸愁是斷絃琴

姪安節遠來夜坐三首

南來不覺歲崢嶸坐撥寒灰聽雨聲遮眼文書元不讀
伴人燈火亦多情嗟余潦倒無歸日今汝蹉跎已半生
免使韓公悲世事白頭還對短燈檠

心衰面改瘦崢嶸相見惟應識舊聲永夜思家在何處
殘年知汝遠來情畏人默坐成癡鈍問舊驚呼半死生
夢斷酒醒山雨絕笑看饑鼠上燈檠

落第汝為中酒味吟詩我作忍饑聲便思絕粒真無策

苦說歸田似不情腰下牛閒方解佩洲中奴長足為生
大弨一弛何緣殼已覺翻翻不受檠

冬至日贈安節

我生幾冬至少小如昨日當時事父兄上壽拜脫膝十
年閱凋謝白髮催衰疾瞻前惟兄三顧後子由一近者
隔濤江遠者天一壁今朝復何幸見此萬里妖憶汝總
角時啼笑為梨栗今來能慷慨志氣堅鐵石諸孫行復
爾世事何時畢詩成却超然老淚不成滴

岐亭道上見梅花戲贈季常

蕙死蘭枯菊亦摧
返魂香入嶺頭梅
數枝殘綠風吹盡
一點芳心雀啁開
野店初嘗竹葉酒
江雲欲落豆稭灰
行當更向釵頭見
病起烏雲正作堆

樂全先生生日以鐵拄杖為壽二首

先生真是地行仙
住世因循五百年
每向銅人話疇昔
故教鐵杖鬪清堅
入懷冰雪生秋思
倚壁蛟龍護晝眠
遙想人天會
方丈衆中驚倒野狐禪

三年相伴影隨身踏遍江湖草木春
擿石舊痕猶作眼
閉門高節欲生鱗畏塗自衛真無敵
捷徑爭先却累人
遠寄知公不嫌重筆端猶自幹千鈞

杭州故人信至齊安

昨夜風月清夢到西湖上朝來聞好語
扣戶得吳餉輕
圓白曬荔脆釀紅螺醬更將西庵茶
勸我洗江瘴故人
情義重說我必西向一年兩僕夫
千里問無恙相期結

書社

故人相約釀錢在
僕夫一歲再至黃

未怕供詩帳

僕頃以詩得罪有
司移杭取境內所

留詩杭州供數
百首謂之詩帳

還將夢魂去一夜到江漲

江漲抗
州橋名

送牛尾狸與徐使君

時大
雪中

風捲飛花自入帷一樽遙想破愁眉
泥深厭聽雞頭鶻

蜀人謂泥滑
滑為雞頭鶻

酒淺欣嘗牛尾狸通印子魚猶帶骨披綿

黃雀漫多脂慙勤送去煩纖手為我磨刀削玉肌

四時詞

春雲陰陰雪欲落東風和冷驚羅幕
漸看遠水綠生漪
未放小桃紅入萼佳人瘦盡雪膚肌
眉斂春愁知為誰

深院無人剪刀響應將白紵作春衣

垂柳陰陰日初永蔗漿酪粉金盤冷簾額低垂紫燕忙
蜜脾已滿黃蜂靜高樓睡起翠眉顰枕破斜紅未肯勻
玉腕半揎雲碧袖樓前知有斷腸人

新愁舊恨眉生綠粉汗餘香在蘄竹象牀素手熨寒衣
爍爍風燈動華屋夜香燒罷掩重扃香霧空濛月滿庭
抱琴轉軸無人見門外空聞裂帛聲

霜葉蕭蕭鳴屋角黃昏斗覺羅衾薄夜風搖動鎮帷犀

酒醒夢回聞雪落起來呵手畫雙鴉醉臉輕勻襯眼霞
真態香生誰畫得玉奴纖手嗅梅花

太守徐君猷通守孟亨之皆不飲酒以詩戲之
云

孟嘉嗜酒桓溫笑徐邈狂言孟德疑公獨未知其趣爾
臣今時復一中之風流自有高人識通介寧隨薄俗移
二子有靈應撫掌吾孫還有獨醒時

雪後到乾明寺遂宿

門外山光馬亦驚，堦前屐齒我先行。
風花誤入長春苑，雪月長臨不夜城。
未許牛羊傷至潔，且看鴉鵲弄新晴。
更須携被留僧榻，待聽摧簷瀉竹聲。

伯父送先人下第歸蜀詩云：人稀野店休安枕，
路入靈關穩跨驢。安節將去為誦此句，因以
為韻作小詩十四首送之。

索漠齊安郡，從來着放臣。
如何風雪裏，更送獨歸人。
瘦骨寒將斷，衰髯摘更稀。
未甘為死別，猶恐得生歸。

日上氣暎江雪晴光眩野記取到家時鋤耨吾正把
月明穿破裘霜雪溢孤劍歸來閉戶坐默數來時店
諸兄無可寄一語會須酌晚歲俱黃髮相看萬事休
故人如念我為說瘦樂樂尚有身為患已無心可安
吾兄喜酒人今汝亦能飲一杯歸誦此萬事邯鄲枕
東阡在何許寒食江頭路哀哉魏城君宿草荒新墓
臨分亦泣然不為窮途泣東阡時一到莫遣牛羊入
我夢隨汝去東阡松柏青却入西州門永愧北山靈

乞墦何足羨負米可忘艱莫為無車馬含羞入劍關
我坐名過實謹謹自招損汝幸無人知莫厭家山穩
竹筍與練裙隨時畢婚嫁無時若相思征鞍還一跨
萬里却來日一庵仍獨居應笑謀生拙團團如磨驢

和王翠六首並次韻

君談陽朔山不作一錢直巖藏兩頭虺瘴落千仞翼雅
宜謹兇放頗訝虞舜陟蹇來已可畏覽鏡憂面黑况子
三年囚苦霧變飲食吉人終不死仰荷天地德我來黃

岡下歌枕江流碧江南武昌山向我如咫尺春蔬黃土
軟凍筍蒼崖折此行我累君乃反得安宅遙知丹穴近
為斲句漏石他年分刀圭名字挂仙籍

君許惠桂
州丹砂

少年帶刀劍但識從軍樂老大服犂鋤解佩付鎔鑠雖
無獻捷功會賜力田爵敲冰春擣紙刈葦秋織箔櫟林
斬冬炭竹塢收夏籜四時俯有取一飽天所酢君生紈
綺間欲學非其脚左右玉纖纖束薪誰為縛勿令聞此
語翠黛頰將惡笑我一間茆婦姑紛六鑿

欲結千年實先摧二月花故教窮到骨要使壽無涯久

已逃天網何須服日華賓州在何處為子上栖霞

樓名

鄰里有異趣何妨傾蓋新殊方君莫厭數面自成親默
坐無餘事回光照此身他年赤墀下玉立看垂紳

平生我亦輕餘子晚歲人誰念此翁巧語屢曾遭蕙
廋詞聊復託芎薺子還可責同元亮妻却差賢勝敬通
若問我貧天所賦不因遷謫始囊空

君家玉臂貫銅青下客何時見目成勤把鈔黃記宮樣

莫教絃管作蠻聲
黃衣漸歎衙香少
擁髻遙憐夜語清

記取北歸携過我
南江風浪雪山傾

君自南江赴任不一過我

記夢回文二首

并叙

十二月二十五日大雪始晴
夢人以雪水烹小團茶
使美人歌以飲
余夢中為作回文詩
覺而記其一句云
亂點餘花唾碧衫
意用飛燕唾花故事也
乃續之為二絕句云

酡顏玉盃捧
纖纖亂點餘花唾
碧衫歌咽水雲凝
靜院

夢驚松雪落空巖

空花落盡酒傾缸
日出山融雪漲江
紅焙淺甌新活火
龍團小碾鬪晴窓

三朵花

并叙

房州通判許安世以書遺余言吾州有異人常戴三朵花莫知其姓名郡人因以三朵花名之能作詩皆神仙意又能自寫真人有得之者許欲以一本見惠乃為作此詩

學道無成鬢已華不勞千劫漫烝砂歸來且看一宿覺
未暇遠尋三朶花兩手欲遮餅裏雀四條深怕井中蛇
畫圖要識先生面試問房陵好事家

次韻陳四雪中賞梅

臘酒詩催熟寒梅雪鬪新杜陵休歎老韋曲已先春獨
秀驚凡目遺英卧逸民高歌對三白遲莫慰安仁

正月二十日與潘郭二生出郊尋春忽記去年
是日同至女王城作詩乃和前韻

東風未肯入東門走馬還尋去歲村人似秋鴻來有信
事如春夢了無痕江城白酒三杯釀野老蒼顏一笑溫
已約年年為此會故人不用賦招魂

是日偶至野人汪氏之居有神降於其室自稱
天人李全字德通善篆字用筆竒妙而字不
可識云天篆也與予言有所會者復作一篇
仍用前韻

酒渴思茶漫扣門那知竹裏是仙村已聞龜策通神語

更看龍蛇落筆痕，色瘁形枯應笑屈。道存目擊豈非溫，
歸來獨掃空齋卧。猶恐微言入夢魂。

浚井

古井沒荒萊，不食誰為惻。鉗罌下兩綆，蛙蚓飛百尺。腥
風被泥滓，空響聞點滴。上除青青芹，下洗鑿鑿石。沾濡
愧童僕，盃酒暖寒粟。白水漸泓渟，青天落寒碧。云何失
舊穢，底處來新潔。井在有無中，無來亦無失。

紅梅三首

怕愁貪睡獨開遲，自恐冰容不入時。
故作小紅桃杏色，尚餘孤瘦雪霜姿。
寒心未肯隨春態，酒暈無端上玉肌。
詩老不知梅格在，更看綠葉與青枝。

石曼卿紅梅詩云
認花無綠葉辨杏

有青
枝

雪裏開花却是遲，何如獨占上春時。
也知造物含深意，故與施朱發妙姿。
細雨裒殘千顆淚，輕寒瘦損一分肌。
不應便雜夭桃杏，半點微酸已著枝。

幽人自恨探春遲，不見檀心未吐時。
丹鼎奪胎那是寶

朱砂紅銀謂之不奪胎色

玉人頰頰更多姿
抱叢暗蓋初含子
落盡穠香已透肌
乞與徐熙新畫樣
竹間璀璨出斜枝

和子由寄題孔平仲草庵次韻

逢人欲覓安心法
到處先為問道庵
盧子不須從若士
蓋公當自過曹參
羨君美玉經三火
笑我枯桑困八蠶
猶喜大江同一味
故應千里共清甘

二蟲

君不見水馬兔
步步逆流水
大江東流日千里
此蟲趨

趨長在此君不見鷓鴣濫堆決起隨衝風隨風一去宿何
許送風還落蓬蒿中二蟲愚智俱莫測江邊一笑無人
識

陳季常見過三首

仕宦常畏人退居還喜客君來輒館我未覺雞黍窄東
坡有奇事已種十畝麥但得君眼青不辭奴飯白
送君四十里只使一帆風江邊千樹柳落我酒盃中此
行非遠別此樂固無窮但願長如此來往一生同

聞君開龜軒東檻俯喬木人言君畏事欲作龜頭縮我
知君不然朝飯仰暘谷餘光幸分我不死安可獨

寒食雨二首

自我來黃州已過三寒食年年欲惜春春去不容惜今
年又苦雨兩月秋蕭瑟卧聞海棠花泥汙臘脂雪暗中
偷負去夜半真有力何殊病少年病起頭已白

春江欲入戶雨勢來不已小屋如漁舟濛濛水雲裏空
庖煮寒菜破竈燒濕葦那知是寒食但見烏銜紙君門

深九重墳墓在萬里也擬哭塗窮死灰吹不起

徐使君分新火


臨臯亭中一危坐三見清明改新火溝中枯木應笑人
鑽斫不然誰似我黃州使君憐久病分我五更紅一朶
從來破釜躍江魚只有清詩嘲飯顛起携蠟炬遶空屋
欲事烹煎無一可為公分作無盡燈照破十方昏暗鑊

次韻荅元素 并引

余舊有贈元素云天涯同是傷流落元素以為今日之

先兆且悲當時六客之存亡六客蓋張子野劉孝叔陳令
舉李公擇及元素與余也

不愁春盡絮隨風但喜丹砂入頰紅流落天涯先有識
摩挲金狄會當同邁邁未必都非夢了了方知不落空
莫把存亡悲六客已將地獄等天宮



東坡全集卷十二

欽定四庫全書

集部

東坡全集卷十三

四

詳校官庶吉士臣謝恭銘

檢討臣何思鈞覆勘

總校官進士臣朱鈞

校對官編修臣戴聯奎

謄錄監生臣曹夢彪

欽定四庫全書

東坡全集卷十三

宋 蘇軾 撰

詩八十一首

蜜酒歌

并叙

西蜀道士楊世昌善作蜜酒絕醇釀余既得其方作此
歌遺之

真珠為漿玉為醴六月田夫汗流泚不如春甕自生香
蜂為耕耘花作米一日小沸魚吐沫二日眩轉清光活

三日開壅香滿城快瀉銀餅不須撥百錢一斗濃無聲
甘露微濁醞醞清君不見南園採花蜂似雨天教釀酒
醉先生先生年來窮到骨問人乞米何曾得世間萬事
真悠悠蜜蜂大勝監河侯

又一首荅二猶子與王郎見和

脯青苔炙青蒲爛蒸鵝鴨乃瓠壺煮豆作乳脂為酥高
燒油燭斟蜜酒貧家百物初何有古來百巧出窮人搜
羅假合亂天真詩書與我為麴蘖醞釀老夫成搢紳質

非文是終難久脫冠還作扶犁叟不如蜜酒無煥寒冬
不加甜夏不酸老夫作詩殊少味愛此三篇如酒美封
胡羯末已可憐不知更有王郎子

謝陳季常惠一措巾

夫子胸中萬斛寬此巾何事小團團半升僅漉淵明酒
二寸纔容子夏冠好帶黃金雙得勝可憐白紵一生酸
臂弓腰箭何時去直上陰山取可汗

贈黃山人

面頰照人元自赤眉毛覆眼見來烏倦遊不擬談玄牝
示病何妨出白鬚絕學已生真定惠說禪長笑老浮屠
東坡若肯三年住親與先生看藥爐

問大治長老乞桃花茶栽東坡

周詩記苦荼茗飲出近世初緣厭梁肉假此雪昏滯嗟
我五畝園桑麥苦蒙翳不令寸地閒更乞茶子藝饑寒
未知免已作太飽計庶將通有無農末不相戾春來凍
地裂紫笋森已銳牛羊煩訶叱筐筥未敢晚江南老道

人齒髮日夜逝他年雪堂品空記桃花裔

魚蠻子

江淮水為田舟楫為室居魚鰕以為糧不耕自有餘異
哉魚蠻子本非左衽徒連排入江住竹瓦三尺廬於焉
長子孫戚施且侏儒擘水取魴鯉易如拾諸途破釜不
着鹽雪鱗芰青蔬一飽便甘寢何異獺與狙人間行路
難踏地出賦租不如魚蠻子駕浪浮空虛空虛未可知
會當箕舟車蠻子叩頭泣勿語秦大夫

弔李臺卿并叙

李臺卿字明仲廬州人貌陋甚性介不羣而博學強記罕見其比好左氏有史學考正同異多所發明知天文律歷千載之日可坐數也軾謫居黃州臺卿為麻城主簿始識之既罷居於廬而曹光州演甫以書報其亡臺卿光州之妻黨也

我初未識君人以君為笑垂頭若病鶴煙雨霾七竅弊衣來過我危坐若持釣褚裒半面新醜蔑一語妙徐徐

涉其瀾極望不得徼却觀元嫵媚士固難輕料看書眼
如月罅隙靡不照我老多遺忘得君如再少從橫通雜
藝甚博且知要所恨言無文至老幽不耀其生世莫識
已死誰復弔作詩遺故人庶解俗子譙

曹既見和復次其韻

造物本兒戲風噫雷電笑誰令妄驚怪失匕號萬竅人
走江湖一一操網釣偶然連六鼈便謂此手妙空令
任公子三歲蹲海徼長貧固不辭一死實未料難將著

草筭除用佛眼照何人嗣家學恨子兒尚少嗟我與曹
君衰老世不要空言今無救竒志後必耀吟公五字詩
義重千金弔收藏慎勿出免使羣兒譙

次韻孔毅甫集古人句見贈五首

羨君戲集他人詩指呼市人如使兒天邊鴻鵠不易得
便令作對隨家雞退之驚笑子美泣問君久假何時歸
世間好句世人共明月自滿千家墀

紫駝之峯人莫識雜以雞豚真可惜今君坐致五侯鯖

盡是猩脣與熊白路旁拾得半段槍何必開爐鑄矛戟
用之如何在我耳入手當令君喪魄

天下幾人學杜甫誰得其皮與其骨劃如太華當我前
跛狎欲上驚嶒崿名章俊語紛交衡無人巧會當時情
前生子美只君是信手拈得俱天成

詩人雕刻閒草木搜抉肝腎神應哭不如默誦千萬首
左抽右取談笑足夜吟石鼎聲悲秋可憐好事劉與侯
何當一醉百不問我欲眠矣君歸休

膏明蘭臭俱自焚象牙翠羽戕其身多言自古為數窮
微中有時堪解紛癡人但數羊羔兒不知何者是左慈
千童萬句卒非我急走捉君應已遲

六年正月二十日復出東門仍用前韻

亂山環合水侵門身在淮南盡處村五畝漸成終老計
九重新掃舊巢痕豈惟見慣沙鷗熟已覺來多釣石溫
長與東風約今日暗香先返玉梅魂

食柑

一雙羅帕未分珍
林下先嘗愧逐臣
露葉霜枝剪寒碧
金盤玉指破芳辛
清泉蔌蔌先流齒
香霧霏霏欲喫人
坐客慙慙為收子
千奴一掬奈吾貧

大寒步至東坡贈巢三

春雨如暗塵
春風吹倒人
東坡數間屋
巢子與誰鄰
空牀歛敗絮
破竈鬱生薪
相對不言寒
哀哉知我貧
我有
一瓢酒
獨飲良不仁
未能賴我賴
聊復濡子唇
故人千
鍾祿
馭吏醉吐茵
那知我與子
坐作寒蛩呻
努力莫怨

天我爾皆天民行看花柳動共享無邊春

元脩菜

并叙

菜之美者有吾鄉之巢故人巢元脩嗜之余亦嗜之元脩云使孔北海見當復云吾家菜邪因謂之元脩菜余去鄉十有五年思而不可得元脩適自蜀來見余於黃乃作是詩使歸致其子而種之東坡之下云

彼美君家菜鋪田綠茸茸豆莢圓且小槐芽細而豐種之秋雨餘擢秀繁霜中欲花而未萼一一如青蟲是時

青裙女採擷何忽忽丞之復湘之香色蔚其饒點酒下
鹽豉縷橙芼薑葱那知雞與豚但恐放箸空春盡苗葉
老耕翻烟雨叢潤隨甘澤化暖作青泥融始終不我負
力與糞壤同我老忘家舍楚音變兒童此物獨嫵媚終
年繫余胸君歸致其子囊盛勿函封張騫移苜蓿適用
如葵菘馬援載薏苡羅生等蒿蓬懸知東坡下塔鹵化
千鍾長使齊安人指此說兩翁

二月三日點燈會客

江上東風浪接天，苦寒無賴破春妍。
試開雲夢羔兒酒，快瀉錢塘藥玉船。
蠶市光陰非故國，馬行燈火記當年。
冷烟濕雪梅花在，留得新春作上元。

上巳日與二三子携酒出游隨所見輒作數句
明日集之為詩故詞無倫次

薄雲霏霏不成雨，杖藜曉入千花塢。
柯丘海棠吾有詩，獨笑深林誰敢侮。
三杯卯酒人徑醉，一枕春睡日亭午。
竹間老人不讀書，留我閉門誰教汝。
出簷藜枳十圍大。

寫真素壁千蛟舞東坡作塘今幾尺携酒一勞農工苦
却尋流水出東門壞垣古塹花無主卧開桃李為誰妍
對立鷓鴣相媚嫵開餅藉草勸行路不惜春衫汙泥土
褰裳共過春草亭扣門却入韓家圃轆轤繩斷井深碧
鞦韆索挂人何所映簾空復小桃枝乞漿不見鷹門女
南山古臺臨斷岸雪陣翻空迷仰俯故人餽我玉葉羹
火冷烟消誰為煮崎嶇東蘊下荒徑姪姀隔花聞好語
更隨落景盡餘樽却傍孤城得僧宇主人勸我洗足眠

倒床不復聞鐘鼓
明朝門外泥一尺
始悟三更雨如許
平生所向無一遂
茲遊何事天不阻
固知我友不終窮
豈弟君子神所予

日日出東門

日日出東門步尋東城遊城門
抱關卒笑我此何求我亦無所求
駕言寫我憂意適忽忘返路窮乃歸
休懸知百歲後父老說故侯古來賢
達人此路誰不由百年寓華屋千載
歸山丘何事羊公子不肯過西州

南堂五首

江上西山半隱堤此邦臺館一時西南堂獨有西南向
卧看千帆落淺溪

莫年眼力嗟猶在多病顛毛却未華故作明窓書小字
更開幽室養丹砂

他年雨夜困移牀坐厭愁聲點客腸一聽南堂新瓦響
似聞東塢小荷香

山家為割千房蜜稚子新畦五畝蔬更有南堂堪著客

不憂門外故人車

掃地焚香閉閤眠
簾紋如水帳如烟
客來夢覺知何處
挂起西窗浪接天

次韻子由種杉竹

吏散空庭雀噪簷
閉門獨宿夜厭厭
似聞梨棗同時種
應與杉篁刻日添
糟麴有神薰不醉
雪霜誇健巧相沾
先生坐待清陰滿
空使人人歎滯淹

孔毅甫妻挽詞

結禱記初歡同穴期晚歲擇夫得溫嶠生子勝王濟高
風相賓友古義仍兄弟從君吏隱中窮達初不計云何
抱沉疾俯仰便一世幽陰淒房櫳芳澤在巾袂百年縱
得滿此路行亦逝那將有限身長瀉無益涕君文照今
古不比山石脆當觀千字誄寧用百金瘞

次韻孔毅甫久旱已而甚雨三首

饑人忽夢飯甑溢夢中一飽百憂失只知夢飽本來空
未悟真饑定何物我生無田食破硯爾來硯枯磨不出

去年太歲空在酉傍舍壺漿不容乞今年旱勢復如此
歲晚何以黔吾突青天蕩蕩呼不聞况欲稽首號泥佛
甕中蜥蜴尤可笑跂跂脉脉何等秩陰陽有時雨有數
民是天民天自卹我雖窮苦不如人要亦自是民之一
形容雖似喪家狗未肯弭耳爭投骨倒冠落幘謝朋友
獨與蚊雷共圭華故人嗔我不開門君視我門誰肯屈
可憐明月如潑水夜半清光翻我室風從南來非雨候
且為疲人洗烝鬱褰裳一和快哉謠未暇饑寒念明日

去年東坡拾瓦礫自種黃桑三百尺今年刈草蓋雪堂
日炙風吹面如墨平生懶惰今始悔老大勤農天所直
沛然例賜三尺雨造化無心悅難測四方上下同一雲

甘霖不為龍所隔

俗有分龍日

蓬蒿下濕迎曉來燈火新涼

催夜織老夫作罷得甘寢卧聽墻東人響屐奔流未已
坑谷平折葦枯荷恣漂溺腐儒齷齪支百年力耕不受
衆目憐破陂漏水不耐旱人力未至求天全會當作塘
徑千步橫斷西北遮山泉四鄰相率助舉杵人人知我

囊無錢明年共看決渠雨饑飽在我寧關天誰能伴我
田間飲醉倒惟有支頭輒

天公號令不再出十日愁霖併為一君家有田水冒田
我家無田憂入室不如西州楊道士萬里隨身惟兩膝
泓流不惡沂亦佳一葉扁舟任漂突山芎麥麴都不用
泥行露宿終無疾夜來饑腸如轉雷旅愁非酒不可開
楊生自言識音律洞簫入手清且哀不須更待秋井塌
見人白骨方銜盃

初秋寄子由

百川日夜逝物我相隨去惟有宿昔心依然守故處憶
在懷遠驛閉門秋暑中藜羹對書史揮汗與子同西風
忽淒厲萬葉穿戶牖子起尋袂衣感歎執我手朱顏不
可恃此語君勿疑別離恐不免功名定難期當時已淒
斷况此兩衰老失塗既難追學道恨不早買田秋已議
築室春堂成雪堂風雨夜已作對牀聲

和黃魯直食筍次韻

飽食有殘肉饑食無餘菜紛然生喜怒似被狙公賣爾
來誰獨覺凜凜白下宰太古一飯在家僧至樂甘不
壞多生味蠹簡食筍乃餘債蕭然映樽俎未肯雜菘芥
君看霜雪姿童稚已耿介胡為遭暴橫三嗅不忍噉朝
來忽解籜勢迫風雷噫尚可餉三閭飯筒纏五采

聞子由為郡僚所掎恐當去官

少學不為身宿志固有在雖然敢自必用舍置度外天
初若相我發迹造弘大豈敢負所付捐軀欲投會寧知

事大謬舉步得狼狽我已無可言墮甌難追悔子雖僅
自免雞肋安足賴低回畏罪罟黽倪敢言退若人疑或
使為子得微罪時哉歸去來共抱東坡耒

次韻王鞏南遷初歸二首

問君謫南賓野葛食幾尺逢人瘡髮黃入市胡眼碧三
年不易過坐晚倚天壁歸來貌如故妙語仍破鐫那能
廢詩酒亦未妨禪寂願為尚書郎還賜上方烏

江家舊池臺脩竹圍一尺歸來萬事非惟見秦淮碧平

生痛飲處遺墨鴉棲壁西來故父客金印雜鳴鏑三槐
老更茂花絮春寂寂中微未可料家廟藏赤烏

孔毅甫以詩戒飲酒問買田且乞墨竹次其韻

酒中真復有何好孟生雖賢未聞道醉時萬慮一掃空
醒後紛紛如宿草十年揩洗見真妄石女無兒焦穀槁
此身何異貯酒瓶滿輒予人空自倒武昌痛飲豈吾意
性不違人遭客惱君家長松十畝陰借我一庵聊洗心
我田方寸耕不盡何用百頃糜千金枕書睡熟呼不起

好學憐君工雜擬且將墨竹換新詩潤色何須待東里

任師中挽詞

大任剛烈世無有疾惡如風朱伯厚小任溫毅老更文
聰明慈愛小馮君兩任才行不須說疇昔並友吾先人
相看半作晨星沒可憐太白與殘月大任先去冢未乾
小任相繼呼不還強寄一樽生死別樽中有淚酒應酸
貴賤賢愚同盡耳君家不盡緣賢子人間得喪了無憑
只有天公終可倚

子由作二頌頌石臺長老同公手寫蓮經字如
黑蟻且誦萬遍脇不至席二十餘年予亦作

二首

眼前擾擾黑虻蚋口角霏霏白唾珠要識吾師無礙處
試將燒却看嗔無

眼睛心地兩虛圓脇不露牀二十年誰信吾師非不睡
睡蛇已死得安眠

鄧忠臣母周挽詞

微生真草木無處謝天力
慈顏如春風不見桃李實
古今抱此恨有志俯仰失
公子豈先知戰戰常惜日
吾君日月照委曲到肝膈
哀哉人子心吾何愛一邑
家庭拜前後粲然發笑色
豈比黃壤下焚瘞千金壁
若人道德人視此亦戲劇
聊償曾閔意遽與仙佛寂
孤纍卧江渚永望墳墓隔
作詩相楚挽感慟淚載滴

徐君猷挽詞

一舸南遊遂不歸清江赤壁照人悲
請看行路無從涕

盡是當年不忍欺，雪後獨來栽柳處。
竹間行復採茶時，山城散盡樽前客。
舊恨新愁只自知。

和蔡景繁海州石室

芙蓉仙人

石曼卿也

舊遊處，蒼藤翠壁初無路。
戲將桃核裏

黃泥石間散，擲如風雨坐。令空山出錦繡，倚天照海花。
無數花間石室，可容車流蘇寶蓋。窺靈宇，何年霹靂起。
神物玉棺飛出，王喬墓當時醉卧。動千日至今石縫餘。
糟醕仙人一去五十年，花老室空誰作主。手植數松今

偃蓋蒼髯白甲低瓊戶我來取酒酌先生後車仍載胡
琴女一聲冰鐵散巖谷海為瀾翻松為舞爾來心賞復
何人持節中郎醉無伍獨臨斷岸呼出日紅波碧巘相
吞吐徑尋我語覓餘聲拄杖彭鏗叩銅鼓長篇小字遠
相寄一唱三歎神淒楚江風海雨入牙頰似聽石室胡
琴語我今老病不出門海山巖洞知何許門外桃花自
開落牀頭酒甕生塵土前年開閣放柳枝今年洗心參
佛祖夢中舊事時一笑坐覺俯仰成今古願君不用刻

此詩東海桑田真旦暮

和秦太虛梅花

西湖處士骨應槁只有此詩君壓倒
東坡先生心已灰為愛君詩被花惱
多情立馬待黃昏殘雪消遲月出早
江頭千樹春欲闌竹外一枝斜更好
孤山山下醉眠處點綴裙腰紛不掃
萬里春隨逐客來十年花送佳人老
去年花開我已病今年對花還草草
不如風雨卷春歸收拾餘香還畀昊

再和潛師

化工未議蘇羣槁先向寒梅一傾倒江南無雪春瘴生
為散冰花除熱惱風清月落無人見洗粧自趁霜鐘早
惟有飛來雙白鷺玉羽瓊林鬪清好吳山道人心似水
眼淨塵空無可掃故將妙語寄多情橫機欲試東坡老
東坡習氣除未盡時復長篇書小草且撼長條餐落英
忍饑未擬窮呼昊

橄欖

紛紛青子落紅鹽正味森森苦且嚴待得微甘回齒頰
已輸崖蜜十分甜

海崇

東風嫋嫋泛崇光香霧霏霏月轉廊只恐夜深花睡去
更燒高燭照紅粧

東坡

雨洗東坡月色清市人行盡野人行莫嫌犖确坡頭路
自愛鏗然曳杖聲

生日王郎以詩見慶次其韻并寄茶二十一片
折揚新曲萬人趨獨和先生于為于但信積藏終自售
豈知盃脫本無極竭從冰叟來游宦肯伴臞仙亦號儒
棠棣並為天下士芙蓉曾到海邊郭不嫌霧谷羅松柏
終恐虹梁荷棟桴高論無窮如鋸屑小詩有味似連珠
感君生日遙稱壽祝我餘年老不枯未辦報君青玉案
建溪新餅截雲腴

別黃州

病瘡老馬不任鞿，猶向君王得敝帷。
桑下豈無三宿戀，樽前聊與一身歸。
長腰尚載撐腸米，闊領先裁蓋屨衣。
投老江湖終不失，來時莫遣故人非。

過江夜行武昌山聞黃州鼓角

清風弄水月銜山，幽人夜渡吳王峴。
黃州鼓角亦多情，送我南來不辭遠。
江南又聞出塞曲，半雜江聲作悲健。
誰言萬方聲一槩，鼉憤龍愁為余變。
我記江邊枯柳樹，未死相逢真識面。
他年一葉泝江來，還吹此曲相迎餞。

自興國往筠宿石田驛南二十五里野人舍

溪上青山三百疊快馬輕衫來一抹倚山脩竹有人家
橫道清泉知我渴芒鞋竹杖自輕軟蒲薦松牀亦香滑
夜深風露滿中庭惟見孤螢自開闔

將至筠先寄遲适遠三猶子

露宿風餐六百里明朝飲馬南江水未見豐盈犀角兒

先逢王雪王郎子

時道逢王郎於建昌方北行也

對牀欲作連夜語念

汝還須戴星起夜來夢見小於菟

遠小名虎兒

猶是髭鬚垂

兩耳憶過濟南春未動三子出迎殘雪裏我時移守古
河東酒肉淋漓渾舍喜而今憔悴一羸馬送旅擔夫相
汝爾出城見我定驚嗟身健窮愁不須耻我為乃翁留
十日掣電一歡何足恃惟當火急作新詩一醉兩翁勝
酒美

端午游真如遲迨遠從子由在酒局

一與子由別却數七端午身隨綠絲繫心與昌歎苦今
年匹馬來佳節日夜數兒童喜我至典衣具雞黍水餅

既懷鄉飯筒仍慙楚謂言必一醉快作西川語寧知是
官身糟麴困熏煮獨携三子出古剎訪禪祖高談付梁
羅詩律到阿虎歸來一調笑慰此長齟齬

梁羅暹
造小名

別子由三首

魚別暹

知君念我欲別難我今此別非他日風裏楊花雖未定
雨中荷葉終不濕三年磨我費百書一見何止得雙璧
願君亦莫歎留滯六十小劫風雨疾

先君昔愛洛城居我今亦過嵩山麓水南卜宅吾豈敢

試向伊川買脩竹又聞緱山好泉眼傍市穿林瀉水玉
遙想茆軒照水開兩翁相對清如鵠

兩翁歸隱非難事惟要傳家好兒子憶昔汝翁如汝長
筆頭一落三千字世人聞此皆大笑慎勿生兒兩翁似
不知擣擿薦明堂何似鹽車壓千里

初別子由至奉新作

雙鵲先我來飛上東軒背書隨好夢到人與佳節會一
歡難把玩回首了無在却渡來時溪斷橋號淺瀨茫茫

暑天閣藹藹孤城背青山
眊眊中落日淒涼外盛衰豈
吾意離合非所礙何以解我憂
粗了一事大

同年程筠德林求先墳二詩

思成堂

宰樹連山谷祠堂照路隅
養松無觸廡助祭有馴烏
歸
夢先寒食免啼到白鬚
遙知隣里化醉叟道爭扶

歸真亭

舊笑桓司馬今師鄭大夫
不知徂歲月空覺老楸梧
祭

禮傳家法阡名載版圖會看千字誅木杪見龜趺

過建昌李野夫公擇故居

彭蠡東北源廬阜西南麓何人脩水上種此一雙玉思
之不可見破宅餘脩竹四隣戒莫犯十畝森似束我來
仲夏初解籜呈新綠幽鳥向我鳴野人留我宿襄回不
忍去微月挂喬木遙想他年歸解組巾一幅對牀老兄
弟夜雨鳴竹屋卧聽隣寺鐘書窓耿殘燭

初入廬山三首

青山若無素偃蹇不相親要識廬山面他年是故人
自昔懷清賞神游杳藹間如今不是夢真箇在廬山
芒屨青竹杖自挂百錢游可怪深山裏人人識故侯

圓通禪院先君舊游也四月二十四日晚至宿
焉明日忌日也乃手寫寶積獻蓋頌佛一偈
以贈長老僊公僊拊掌笑曰昨夜夢寶蓋飛
下著處輒出火豈此祥乎乃作是詩院有蜀
僧宣遠事訥長老識先君云

石耳峯頭路接天梵音堂下月臨泉此生初飲廬山水
他日徒參雪竇禪袖裏寶書猶未出夢中飛蓋已先傳
何人更識嵇中散野鶴昂藏未是仙

子由在筠作東軒記或戲之為東軒長老其壻
曹煥往筠余作一絕句送曹以戲子由曹過
廬山出以示圓通慎長老慎欣然亦作一絕
送客出門歸入室趺坐化去子由聞之乃作
二絕一以荅予一以荅慎明年余過圓通始

得其詩乃追次慎韻

君到高安幾日回一時斗數舊塵埃贈君一籠牢收取

盛取東軒長老來

余送曹詩

東軒長老未相逢已見黃州一信通何必揚眉資目擊

須知千里事同風

慎老和余韻

東軒只似虛空樣何處人家籠解盛縱使盛來無處著

雪堂自有老師兄

子由答予詩

擔頭挑得黃州籠行過圓通一笑開却到山前人已寂

亦無一物可擔回

子由答
慎詩

大士何曾有生死小儒底處覓窮通
偶留一峽千山上

散作人間萬竅風

余和
慎詩

余過溫泉壁上有詩云直待衆生總無垢我方

清冷混常流問人云長老可遵作遵已退居

圓通亦作一絕

石龍有口口無根自在流泉誰吐吞
若信衆生本無垢

此泉何處覓寒溫

世傳徐凝瀑布詩云一條界破青山色至為塵
陋又偽作樂天詩稱美此句有賽不得之語
樂天雖涉淺易然豈至是哉乃戲作一絕

帝遣銀河一派垂古來惟有謫仙詞飛流濺沫知多少
不與徐凝洗惡詩

書李公擇白石山房

偶尋流水上崔嵬五老蒼顏一笑開若見謫仙煩寄語
匡山頭白早歸來

贈東林總長老

溪聲便是廣長舌
山色豈非清淨身
夜來八萬四千偈
他日如何舉似人

題西林壁

橫看成嶺側成峯
遠近高低無一同
不識廬山真面目
只緣身在此山中

廬山二勝 并叙

余游廬山南北得十五六奇勝殆不可勝紀而懶不作

詩獨擇其尤者作二首

開先漱玉亭

高巖下赤日深谷來悲風擘開青玉峽飛出兩白龍亂
沫散霜雪古潭搖清空餘流滑無聲快寫雙石硤我來
不忍去月出飛橋東蕩蕩白銀闕沉沉水精宮願隨琴
高生脚踏赤鯁公手持白芙蓉跳下清泠中

栖賢三峽橋

吾聞太山石積日穿綫溜況此百雷霆萬世與石鬪深

行九地底嶮出三峽右長輸不盡溪欲滿無底竇跳波
翻潛魚震響落飛狖清寒入山骨草木盡堅瘦空濛烟
靄間瀕洞金石奏鬱鬱飛橋出湫湫半月殼玉淵神龍
近雨電亂晴晝垂餅得清甘可噉不可漱

陶驥子駿佚老堂二首

文舉與元禮尚得稱世舊淵明吾所師夫子乃其後挂

冠不待年亦豈為五斗我歌歸來引

余增損淵明歸去
來以就聲律謂之

引歸來
千載信尚友相逢黃卷中何似一盃酒君醉我且

歸明朝許來否

我從廬山來目送孤飛雲路逢陸道士知是千歲人試
問當時友虎溪已埃塵似聞佚老堂知是幾世孫能為
五字詩仍戴漉酒巾人呼小靖節自號葛天民

和李太白

并叙

李太白有潯陽紫極宮感秋詩紫極宮今天慶觀也道
士胡洞微以石本示余蓋其師卓玘之所刻玘有道術
節義過人今亡矣太白詩云四十九年非一往不可復

今予亦四十九感之次其韻玉芝一名瓊田草洞微種
之七八年矣云更數年可食許以遺余故并記之

何處聞秋聲
脩脩北窓竹
回薄萬古心
攬之不盈掬
靜坐觀衆妙
浩然媚幽獨
白雲南山來
就我簷下宿
懶從唐生決
羞訪季主卜
四十九年非
一往不可復
野情轉蕭散
世道有翻覆
陶令歸去來
田家酒應熟

寄卧虛寂堂
月明浸踈竹
泠然洗我心
欲飲不可掬
流光發永歎
自昔非予獨
行年四十九
還此北窓宿
緬懷

卓道人白首寓醫卜謫仙固遠矣此士亦難復世道如
奕棋變化不容覆惟應玉芝老待得蟠桃熟

次韻道潛留別

為聞廬岳多真隱故就高人斷宿攀已喜禪心無別語
尚嫌剃髮有詩斑異同更莫疑三語物我終當付八還
到後與君開北戶舉頭三十六青山

東坡全集卷十三